

Presbyterian Church in India (Reformed)



# MESSENGER

VOL. 42 NO. 02

FEBRUARY 2026



SUNDAY SCHOOL PAT NI  
FEB. 01

PCI SCHOOL RE-OPEN  
FEB. 02

ZOMI NATIONAL DAY OF PRAYER  
FEB. 08

ZOMI NAMNI  
FEB. 20



*Kum. Thupi*  
**KHRIST A KILAMTHAKNA**

*Feb. Thupi*  
**THUMNA & GELNA TUNGTAWN A KILAMTHAKNA**

*Editor :*  
*Rev. Dr. Khlen P. Tembing*

**PRODUCTION TEAM**

**Editor**

*Rev. Dr. Khen P. Tombing*  
*C/No. 9862088190*

**Jt. Editor**

*Rev. Dr. G. Pau Muanthang*  
*C/No. 7085645785*

**Contributing Editors**

*Elder S Khamminthang*  
*Pastor M Khamlianmang*

**Cir. manager**

*Elder C. Biaklun*

*A tuun khakte*

**Kilamthana dia : 01**  
**geelna**

**Thutak kichi : 04**  
**ki thei-thei hia?**

**Khrist a suahtakna : 07**

**Lunggulhna diklou in : 13**  
**bangteng hon tun amai a le?**

**Na thumna bang : 17**  
**level ahia?**

**Gen Z : 21**  
**Bangchi thunun ding?**

**Report : 27**

**Thumna Pitu : 30**

*A sung a* **THU KISUAHTE**  
**EDITORIAL BOARD**  
*ngaihdaan ahivek tuan kei*

*Printed, published and edited by*  
*Rev. Khen P. Tombing*  
*at Thawmsons Color Press*  
*for the Presbyterian Church in India*  
*(Reformed)*

1 CORINTHIANS 13:13

And now these  
three remain:

**FAITH,  
HOPE  
AND LOVE.**

But the greatest  
of these is love.

*love.*



## KILAMTHAKNA DIA *Geelna*

America gam hong piankhiakna dia bulphuttute (*founding fathers*) laka poimoh mahmahte laka khat Benjamin Franklin ahi. Amah ahiehleh President tutpah a khatvei zong tukha kei mahleh, anasep, a lunggelna leh apanlaknate America in chikmah chia mangngilh theilou ding uhi. Athilhihle a nasep pahtawina in Americate sum note lian penpen Dollar 100 note a lim tuansak in om hi (*hiai sanga note lianzaw om mahleh huaite nautang laka kizang lou hi*). Aman kalsuanna ding a gelkholhna apoimoh dan hichiin ana gen hi, “*Kisakkholhna a na lohsap leh, a lohsam dia kisakhol na hi*” chia agen tuh thudik mahmah ahi.

Mihing khatpeuh hinkhua a lohchinna dingin kisakkholhna leh gelkholhna lou in lohchinna taktak kitung theilou hi. Huai ding a kisakkholhna bangmah neiloute tuh amaban uh lohsap ahi mai hi. Gelkholhna i chih Chiangin athupi ding, a lian ding leh a sang ding chihna hipahlou hi. Thilneuchik ah leng lemgelna nei a kisakkholh theih hi. Etsakna dingin mikhual khat i neih leh antang noubangzah khakbeh ding chih lel leng gelkholhna ahi. Hiai thil neuchik kia mai hilou i

ngei-naseh i niteng hunzatdan nasan leng gelkholh a ngai gige hi. Kei hihzel dan tangpi ahiehleh, zing ka khanloh tungin tuni bangni chih theichian masa, huai zoh tuni hiai ni ahieh Chiangin hiai bangte hihngai ding eive chihthe a kimsipsip (*detail*) hikei leh leng a guhgel teng bek gelsa toh ka thoukhe sek hi. Hiai in ka nikhat hunzatna ding hon navaksakin, sepding, sepzoh ding leh a poimoh masa chihthe ah nasep hon makaihin in i nikhat hunzatna hon kizensak tuan mahmah hi.

Nasep ding a neu a lian gelfel leh gelna in a hon makaih chiangin nasep hon lamzangin, na lianpipi a hon semzou sak zel hi. Nehemia in maban ah nasepthupi mahmah asepkhiak na ding in ‘*gelna*’ hoihtak nei masain nasep hon pan hi. Bangchi banga Nehemia in kulhbang tunding nawn na ding nei hiam chih hiai a nuai ah saulou i en ding.

1. *Thumna toh Gelna*: Nehemia in kulhbang lamna dinga agelna masa i muhtheih ahiehleh ‘*thumna*’ ahi. Huai omdan tuh amah hatna leh thilhihtheihna a zohvualloh leh sepvualloh nna ahihman in Pathian ma ah kiniamkhiakin, Pathian dehsakna ngen in anasep ding thumna toh alan hi. Huai tuh Khristian huai mahmah nasep ding gelna masa a poimoh mahmah hi. I singtangpa kivakna dan ah tuh lou nasema khosate i hi uhi. Ka neulai a katheihkhak tamlou lou nasep toh kisai in hiaite ahi. Louvat kipatni a thumna toh pan huchimah bangin buhtuh patni, buhlakpat ni chihthe a thumna toh pat chihthe ka theikha hi. Huai tuh hihdan hoihmahmah hi in ka thei hi.

2. *A poimoh theih masak*:

Anihna a Nehemia in agelnawn ahiehleh kulhbang tunding nawnna ding in bangteng poimoh a, koimun a pat a, bang sepmasak ding hiam chih theikhe masa hi. Sapte thupil khat apan i theih mahmah uh ahiehleh, “*Abul pathoih a kimkhat zohsa*” chih ahi. Huaiziakin a bul a i pathoih theihna ding in nasepna ding leh i kalsuanna ding a bangteng poimoh masa hiam chih theih poimoh mahmah hi. Huai ding in Nehemia a nasep masak poimoh mahmah ahiehleh kuamah theihpilhloh in zankal in Jerusalem vel in ana enkual masa hi (Neh. 2:11-16).

3. *Mite toh kituak ding nna pia*:

Huai bangte ahizoh nungin Nehemia in mite thathousak a huaitakin miten, “*Thou ni in lam ni*” (Neh. 2:18) chi in kithalawpna toh nasem ding in hong kihatsak uhi. Huai toh kizuiin Nehemia in mite amau hihtheihna toh kituakin mohpuakna leh panmun pia in kulhbang tunding nawnna nasep hon sem uhi. Hiai a Nehemia lemgelsiamna hong kilang khat

ahihleh mite amau inn mun zawnte ah kulhbang lam dingin tan hawm hi (Neh. 3:10, 23, 28, 29)

#### 4. *Melma theihchetna:*

Nehemia lemgelnate laka poimoh mahmah khat ahihleh melma theihthelna ahi. Nehemia a melma kuate hi a, amah nasepna a hatlouna tuntu leh sunawngkai thei dingte theichian in hangsan takin dou in pang hi. Huchibanga melma khemna leh zolna a tuah lai in in

hangsantak a dou in anasep a dingkip hi (Neh. 4:7-11; 6:1-3). I Khristian hinkhua ah leng i melma kua ahia? Bang thilhihtheihna nei ahia? Bangchi banga nasem a panla ahia chihte i theih chiangin amah dou dan ding leh amah hon dounate zou dinga kisakkhlin lemgelna i nei thei hi.

Awle, tu kha kilamthakna dinga lemgelna toh kisai gen a panla dia i kisak lai in hiaite thei in kalsuan sawm ni.



Singngat Presbyterian Church Silver Jubilee lopna January 24, 2026 in zat hi a, Rev. Dr. Khen P Tombing in Jubilee Suang Honna leh Latna nei hi. Kho tuamtuum apan saptuum upa khenkhat leh Pastor tamtak in hiai hun uap ua, nitaklam in ankuang umkhawm uhi.

# THUTAK *kichi* KI THEI-THEI HIA?

- Mr. Lalpu Hangsing, +918014840858

*“I don’t believe in truth – the truth is, ‘truth cannot be known’*

*(Anonymous)*

*“The game of doubting itself presupposes certainty.”*

*(Wittgenstein)*

Pilate in Jesu Khrist thudotna a neihlai in, Jesu Khrist in “Thutak” toh kisai a gen hi (John 18:37). Huai hun in Pilate in engpau (sarcastic) deuh in, “*Thutak bang ahia?*” (John 18:38) achi hi. Hiai Pilate dotna omzia tungtawn a thil nih kithei theite tuh: *a*). *Thutak kichi omlou, b*). *Thutak kichi aom himahleh kuamah in thei theilou*, chih ahi. Hiaite pen tuh tulai a mitampi’ *thutak* toh kisai a abuaina leh dotna adot theih sek uh ahi. Mi khenkhat abiiktakin khovel pilna lam a thuuklut kichi deuhte leh sahkhoham thilte theihchetna dik neiloute’n “thutak” kichi pen “thudik” banga kilang thei ngaihlan leh pilna tampi aom ziakin theih theih hilou banga gingta in aom uhi.

A khen in lah thutak i theih theih chiantan om a, PATHIAN leh dik-le-diklou tehna (morality) toh kisai bel kithei theilou chih gingta pawl om hi [Tubang mite pen genna in sappau ah “Skeptic” chih kammal *Skepticism* apan kilakhia kizang hi] Tuabang khovel etdan nei mite pen Khristian te’n bang

chidanin dawnna i pethei dia? Sinsakna leh thugin peuhmah in *kingakna* anei vek uhi. “*Pathian omlou*” chih sinsakna neite tanpha in “*Pathian omlou*” chih pen a dik banga pom a huai a *kinga* in sinsakna apia uhi. Huanah, “*Thutak kithei theilou*” chi te’n le tuapen *thutak kingakna* a pom

in sinsakna a bawl sek uhi. Tuabangmahin, mikhempeuh huaibel, a ngeek pen apan upa pen tan in thil agen peuhmah Chiang un *thudik* banga pomsa *kingakna* (a *dik* dan etchet ngai nawnlou bang a ngaih) a nei vek uhi. Khristiante'n leng PATHIAN leh a thilsiamte toh kisai Ama gendan Lai Siangthou' hon sinsaknate pen *thutak* ahihdan theih leh pom a nei masa a dawnna piak a poimoh gige hi. Tua pen hih ding him ahi! Huai lungsim a vom kawm in, Pilate leh amah banga "thutak' hihna ngaihtuahte' (Skeptic te) thugin dawnna thuvual tomchik chik 2 in i gelh suk ding.

***Khatna ah, "Thutak kithei theilou" chih tuh "thutak" ahi theikei hi.*** Thuvual pen in *thudik* hi a apom *akingakna* (*principle*) pen bangmahlou a suaksak hi. Kithei thei lou hiletuh "*thutak ki thei theilou*" chihpen mah leng theih theih hilou dia, adik theikei ding hi. Hiai tuh "*Thuvual sau pen tuh thumal 3 (thum) apha hi*" chih bangphet a thil hitheilou ahi. Ngentel taka ngaihtuah hilehang "*a dik pen kithei theilou*" chisek mi tuh a

theih theihlough khat a theih theih leh dik banga koih mi ahi a, tua pen omzeneilou ahi. Selkahnua zia hiam, thei hi a kikoih luat ziaka suanlam dia zatttheih mawk chii ahikei hi.

***Nihna ah, "thutak" khenkhat a dikna uh Chiangtak a theih dia lahkhiak theih ahi.*** PATHIAN toh kisai leh khalam vai thil khenkhatte Chiangtaka A kilaakna leh *theih* theihna dinga geel a omsa pansan a lahkhiak theih in aom veve hi [*PATHIAN Kha hinapi a kimuthei* chihna hilou in thilsiam leh Jesu Khrist a A kilakna (General & Special revelation) tungtawn a *theihna* pen genna ahi zaw hi] Nambar, mun min leh hun leh kum chihnte leng ahihna uh *thutak* Chiangset a theih leh lahkhiak theih in aom uhi.  $4+8=12$ , *Songtal khua pen Mual-nuam khaw gei a om khua ahi*' chih leh '*PCI (R) Saptuam tuh Mualkoi khua a April 20, 1984 kum a phuh-khiak ahi*' kichite tuh nial vuallouh a theih theih *thutak* ahi. Hichidante pen *skeptical* taka et ahih hun a leng nawlkhiin theihlough *thudik* ahi uh.

Mi khenkhat in, “*Sahkho vai, ginna leh khalam thilte pen theih chet theihlauh ahi,*” chi bangin genthei sek uhi. Himahleh, ginna leh khalam thil hiloute theih theihna dia lampi tot ding aom banga sahkho vai, khalam leh ginna thilte leng theihchet ahihna ding ua a lampi pen tot a poimoh hi. Tua tungtawn in huai thugin or khalam vai thilte pen theihchet theihna a-om hi. Tua ahihmanin, hiaite ah leng “*Thutak or hihna diktak theih theih hilou*” chih in atup a genkha kei hi.

Khristian te’ gindan ah *thutak* kichi a-om a, a *theihchet* theih hi. Khristian te’ tehna dan in *thil dik* or *thu dik* kichi pen *reality* toh akituah chiangin *dik* ahi pan sek hi [Tua pen sappau in *Correspondence Theory of Truth* a kichi hi] Etsakna dingin: “*Zulei (Squirrel) cycle a tai*” kichi tuh *thudik* ahihtheihna dingin *Zulei* pen *cycle a tai* a, *cycle tai taktak a muh ahih* angai hi. Khristian etdan ah *reality* pen Siamtu PATHIAN’ (Genesis 1:1-2) bawldan leh gendan ah a kinga hi.

Huai *reality* theihchet theihna ding in PATHIAN in Ama’ lim-le-mel batpih in mihing A siam a, thilsiam leh Jesu Khrist a kilaakna tungtawn in *thutak* a theisak hi.

Awle, PATHIAN leh A kilaakna tungtawn a *thutakte* khovel pilna leh theihna tan lel a nialna bawl mite ngaihdan haatna hun leh mun a Khristian te khosa i hi uhi. Thutak thu theih theih na mite lama del sak, ginlelh leh muanlauh sak na a om ding him ahi. Khovel pilna leh thil ngaihsut ziate pen PATHIAN theihna dal ding a sangtak a aom hun a tuate diklouna lakkhe ding leh phuk zel a, ngaihtuahna chiteng Khrist thumanna sikha a pi dingte i hi uhi (II Korinthte 10:5). Tuhun a *thutak* chiangtaka theisaktu hi a, tua *thutak* mah a kilamtou hidingin PATHIAN in hon vualzawl hen!

# KRIST A *Suahtakna*

- Rev. Dr. G. Pau Muanthang

*Thutak na thei ding ua, huai Thutakin a hon suaktasak ding  
(Jn. 8:32)*

Tulai khovel huihnung leh kihei dan i et chiangin, muh chih kilchih a buaina haksatna leh lungphong thei thiltung tampi a om hi. Kumpaisa naichikte enle Nepal buaina, Bangladesh buaina, Israel buaina, leh tukum bula om pan himahle hang US leh Venezuala gam gal buaina, Iran a mipi kiphinna chihte leh eisung mahmah a abeilou buaina i neihte a om hi. Hiaite bangziaka om hiam i chihleh, tomchika a gen in “Zalenna,” “Suahtakna” chihte a goal uh ahivek hi. Hiai in hon sinsak theih bang hiam i chih leh kuamah thuneihna nuai a omlou a eimah deihbang hoihsak bang leh tupdan banga khosaktheihna mah miteng lunggulh ahi chih hon musak hi.

Awle, huchibang khovela i omlai in i Lai Siangthou ah Jesu mahmah kampau apanin hiai zalenna leh suahtakna honchiam i muhtheih pansanin saulou gelh le chi i hi. I Lai Siangthou kilakna mun (*a context*) ah enle hang Judate toh Jesu kihouna ahi a, huai ah tuh Judate hiai suahtakna na chih bang chi dan hiam ‘*Kou Abraham suante koi a saltang unga suahtakna ding thu gen na hiam?*’ chi dan uh ahi. Himahleh Jesu’n salam saltanna a suahtakna gen-ut masa hilou in, huai sanga thuuk zaw khalam saltanna pan suahtakna gen ana hi hi. Khalam saltanna apan suakta hileh uh a

salam saltanna tampite ua pan leng suahta ding uh chihna leng ahi. Huaiziakin Jesu Khrist in huai suahtakna deihsak in Salam saltanna sanga thuuk zaw Khalam saltanna apan a suahtak ding uh deihsak hi.

Huai thutak bang ahi dia le? chih dotna poimoh mahmah ahinawn hi. Jesu gen dan leh a tupdan manpha loute a ding in *'thutak'* tuh  $1 + 1 = 2$  chih khong ahikheileh niteng thil muhte *'Suahlam a ni suak,'* ahikheileh *'phalbi chianga khuavot'* chihthe khong toh kibang lel in ngaihtuah theih ding hi. Ahitakin huai adikna toh kituakte thutak ahi a, huai in suahtakna hon peloupi chih theih mah ahi. Huai a thutak chih mankhaloute a ding in suahtakna a piak malak sangin ahisa, a dikna omsa khat aleltak vele chihtheih ding hi. Himahleh, Jesu'n hiai a *'thutak'* a chih a tuampi ana hi gige hi. Huai thutak tuh ahing ahi a, thilhihtheih, nasemthei leh zalenna pethei a poimoh mahmah uh ana hi gige hi.

Huai *'thutak'* tuh tomchik a gen ding hileng: Jesu Khrist mah ahi a (Jn. 14:6), a thu sinsakte (Jn. 8:34-36) chihna ahi. Huai tuh gentuam luat na ding omlou 'amah leh a thusinsak' kiton a paikhawm ahi. Huai ziakin 'amah gingtate a thusinsak pomte hi a, a thusinsak pomte amah gingtate' mah hizel hi. Huai gingtaten suahtakna leh zalenna nei uh chihna ahi. Huaiziakin, huai a baihlamtak a i muhtheih (*immediate effect*) ahikhele, pianken khelhna apan suahtak ahi. Huai tuh mihing kipiakteihloulou, himahleh Jesu Khrist a ginna koihte hamphatna ahi. Laphuaktu Haldor Lillenas in hichi'n a gen hi: *"Khatvei khelhna kolbunin ka tanga suahtak tum mahleng suahta zoulou. Hizong suahtakna tuin ka neita, Jesu'n ka kolbuh teng tansakta."* Hiai a laphuaktu in suahtakna zalenna amuh, a tan pen midang apan hilou in Jesu Khrist akipan ahi chih a kichian mahmah hi. Huai thutak suahtaksakna in amah hinkhua ah nasem in niteng khelhna leh thang-

awk theihna tuamtumte: *Enna, huatna, kisiat leh kinakna, Kiletsakna leh ki-otsakna, Kisaktheihna leh khelh nopsakna, Sum-le-pai hauhna deihtakna, Launa, thawm-hauna, Mangbat lungzinna'* chihthe tengteng apan suahtakna hong pia ahi chi in laa in a na phuak hi. Hiai laphuaktu in genchian leh genkha kasa mahmah hi. Huchimah bangin mi khatpeuh piangthak hinkhua hiai bang ahi ding hi.

Tuni a huaisang a sauzaw leh ahup lianzaw Jesu Khrist honbawl suahtakna ompen uanggen ut i hi. Jesu Khrist a suahtakna in hiai khalam suahtakna kia mai huam ahi diam? I sa pen in utut ne, utut hih leh poilou i kha a suahtaknak leh i chi thei diam? Hilou le, hiai bang ngaihda tuh Lai Siangthou sinsakna toh kituaklou ahi. Pianthakna tuh khatvei thiltung himahleh piangthak hinkhua ah bel nitenga galdou ding, khemna apan suahtakna ding leh ei hon hihnok

om thei gigete apan kikep siangthou leh gualzoh ding chih niteng na ahita hi (Heb. 12:1). Huai kia mailou, i pianthakma hinkhua leh ngeinate a leng awk gige theih ana hilailai h. Paul in Kolossa saptumte kiangah piangthaksa himahleh ngeina dan (traditions) a saltanna apan Khrist in hon piak suahtakna pansan a suakta ding i hih dan ana gen hi. "*Pilvang un huchilouin zaw kuapeuh in Khrist thu bang hilouin, mihing thugousiah leh khovel thubulte bang zawin a thupil u leh khemna peuhin gallak in ahon lakha ding uhi,*" (Kol. 2:8; 16-23, cf. Gal. 5:1, 4:8-11).

Piangthaksa hiai bang hinkhua a om dia 'gallak, galmat' bang a kimat khak theih mawk ding mah a diam chih theih kha ding hi. Himahleh, hiai bang chindan leh ngeinate a Piangthaksate ki-awk mahmah ahi chih kei mahmah inleng ka muh leh ka tuahkhak a om mawk hi. Khatvei mouhelna a ka tuah khak ahiehleh, a kiten ni

ding ka hong kikap Chiang un February kha pen hong buaihuai mahmah mawk hi. Bangziak hi ding hiam i chih leh February kha pen a kha bukamlou, ani chinglou chih peuh hong hi. Huailou a dang ding i hon gen nawn chia ‘*ani kopkim, kopkim lou*’ thu bang hong buai huai nawn mahmah get zell!! Huiha! Hiai ngaihdan teng koi a hong kipan ahia i chih chianga, Pu le Paten deihlou, vang omlou chih khong peuh hong hita genkhatpi hong suakthei mawk hi. Kei na theihdan sam abel a numei (amou di pen) a lem nak leh ani dangteng lem thei ziau ding i sak leh ana huchideklou mawk!!

Ka thil tuah dang khat, Lai Siangthou sina inn nosia mundanga omkal in ka zi leh tate ka innpi uah ka nosia hi. Ahihleh ka Pa’n zong inn nuai awng a ompen a na um in, ka zi leh tate inn nuai ah ana khosa sak hi. Ahihleh hiai pen zong ka Nite laka khat in lemsatheilou in naktak in ka Pa bang ana thuhilhin, “*Nau zaw U Pa innuai,*

*innkhang a ten ngeilouh a kin akin in Pau Muanthangte kisuankhesak un*” ana chita. Ken leng huai ka theih Chiangin a bang toh kisai a hia? Ei omlouh kal a, innpite toh kinai leh Nu le Pa pangbel a ka zi leh tate ana khosak uh kizen lua kasak leh, i ngeinadan a ana lem deklou khat ana hizel hi. Himahleh hiai toh kisai a ka Pa thugen hoih kasak mahmah ahihleh, “*Hiai khong i suahtakna ding hi ei*” a chih in genkha mahmah kasa hi. Huailou in i Pu leh Pate ngaihdan paipih mahmah khenkhat in “*March leh April kha pen khualzin sianglou*” chih bang ana pompih mahmah taget pawl ki-om a, khatvei ka meeting na uah hiai bang khanglui gindan hong ki puaklut khak ziakin hiai kha sungte a tuh saptuamten mission field vehlou mai dan eive!!

Eikia hisamlou, US a ka omlai in amau lamten zong hiai bang ngeina dante ginna aneih khenkhat uh ana om hi. Limlak kek a ki-et bang deihtetlou uhi. Huailouin i Ni

simna a Ni 13 pen bang 'vangneilou' (*unlucky*) ahi chi in Ni 13 ni a khualzin bang utlou, deihlou se uhi. Huai banah, Korea ten leng angeina dan uah a innsawngte bang uah a sawng lina (4<sup>th</sup> floor) bang, number li a deihlouziak un a sawnglina bang omlou mawk, a number pelou mawk dan uh hi. Huaiziakin, a sawnglina pen taikan mawk uhiam ahihkeileh 'F' (floor) chih kia koih mawk dan uhi. Huai bangziak hiam i chih leh amau ngeina dan ah number 4 loh dan (*sa* chih pen) *sihna* genna hiam ahihkeileh 'vang neihlouhna' toh kibang ahihziak in huaipen deihlou ana hilaizang uhi. Huai banah, i tenna Manipur gam, Meiteite lakah bang huchidan tamdiak a de aw ka chihna om hi. Ei lak ah leng hiai dan gen ding neuhneuh tampi i nei hi: Veilam kisuihkhak, ann nek chia neh/lei keih khak, mitnuai/mitung ling ahihkeileh kisat, khutchin a kaang om, akpi khuang, zulei lamkan, zohngeu lamkan, hahchiau, mi nih in a kiton thukibang genkha,

innkuan khat apan minih akiton a mamohna lam kibanglou a zinkhiaklauh ding, chih leh a dangdang tampi i nei hi.

Hiai bang ngeina dante'n i theihlouh kalin honna kolbulh in gallak in honna lasek ahi chih i theih thak hoih kasa hi. Huaimah tuh Paul in Galatia leh Kolosa saptuamte kianga ana gen ahi chih i thei hi. I kol-awk dan ahihleh hiaite kalhna nasep ding bang hong om chianga, kisiamtanlouna lungsim a om geuguau, hihngamlou kitam mahmahlai mawk hi. Khenkhat bang in khualzin ding thulh hial, kiten hun ding bang suan gamla ahihkeileh suannai hial mawklai hive hang aw. I Pathian lianpen, hatpen, thilhihtheipen i chih ngalleh bang ziaka hiai i ngeinate, tangthu bulbal neiloute leh chindan Pathian ginhuailoute a awk awk lai i hia le? chih ki-ngaihtuah tham kasak hun tam mahmah hi. Ken zong ka pal kha, ka U pa inn nuai a ka ten ziakin bangmah ka chih lam ka theikei, huaiziaka hiai bang

vangsiatna, haksatna hongtung hi ding eive chih ding leng tutan ka thei kei. Hiaite tengteng apan leng suakta dingin Pathian in Jesu Khrist a hon suahtaksak i hi chih thei ni. Unaute i Pathian zaw i muangngam na zahzah a muanhuai ahi, i muangngam kei sek a. Khatvei vei a 'risk' i lak ngam ngai ahi. Isrealte gamdai khualzin sungin luipi nihvei akan na uh i muthei hi. Huai i et vengveng chiangin Tuipisan akan lai un Mosi chiang in tui a satkhak chiang kia in huai tuipisan tuh hong kikhen lel hi. Hiai hun ah tuh amau sukha hiallou ahihmanin a *risk* a sang lawkei hi (Exo. 14). Himahleh Pathian gamchiam Kanaan gam lut na ding taktak ahong tun hial ding chiangun zaw a *risk* a sang mahmahta. Huai hun a Jordan lui a kan na ding uah tuh chianga tui sat lel hitalouin, Pathian' bawm zawng Siampute khe in tui a kuang dim a luang zuazua asukkhak kei leh tui kikhen mawklou hi. Hiai dinmun ah tuh Tuipisan khan toh teh a 'risk' a sang mahmah hi. Huai Jordan lui a luikuang dim zuazua a

luang sunga khe va ngap suk mawk ding tuh *sih leh hin* kal ahita hi. Chik a apalkhak ngeina uh hilou, a lui thuk ding maw dai ding mawk chih theih hiloupi a khe ngaksuk ding chih ahita mai hi. Himahleh, Siampu Pathian bawm zawngten tuh Pathian muanna in a sik ngam ua Kanaan gamchiam a tung uhi (Jos. 3-4). I hinkhua a khanglui ngeina leh chindante nose ngam ding khop a Pathian ginna a *risk* i lakngam chiangin vualjawlna thupitak i mu ngei ding hi. Huai ginna lah Pathianin eilam a hon lamet ahi ngal a.

## LUNGGULHNA DIKLOU IN *Bangteng hon tun amai a le ?*

Genesis 3:1–7; 1 John 2:16

- DK Siam Hangshing

A tung a kipan in Satan in mi a khem Chiang in, khem a om peuhmah in khovel a muhdan uhleh Pathian muanzohlouhna leh ginlehna piangsak ding in ana khem hi. Eden huan a Adam leh Eve kiang mah ah leh hiaibang paidan (technique/methods) zang in ana khem hi. Pathian in a dik leh a diklou; hih ding leh hihlouh ding Chiangtak a gen hinazen pi in, Dawimangpa'n Pathian' thu ginlelhna piangsak in Pathian' hoihna musaklou hi.

### **Genesis 3:6 I en masa ding uh**

*“Numei in singgah nek theih ahi chih leh mit hiptak ahi chih leh mi pilsak ding a singgah etlahhuai ahi, chih atheih in agah alou a, aneta hi. Akiang a om apasal leng apia a, ama'n leng aneta hi.”*

Hiai Bible chang a kipan in, Adam leh Eve khem a aom in, khemna/ lunggulhna namthum a khem in om uhi. singgah tuh 1) Singgah nektheih, 2) Mit hiptak leh 3) Mipilsak ding a etlahhuai ahidan hon mu khia hi. Hiai khemna/ lunggulhna/duhgawlina chi thumte

tuh Johan liakhak khatna bung, - 2 chang - 16 a kigelh 'khovel a kipan taksa utnate, mit utnate, damsung thupina limte' ana hi maimah hi. Dawimangpa'n mikhemna ding in a vanzat kibangtou den lai a, Jesu ngei leng hiai khemna tengmah pansan in khemin ana om hi. Eite leng hiai duhgawlina te a kipan in i suakta tuan kei ua, hiaiteng mah zang in khemtupa'n a hon khemkhem hi. Sa lunggulhna a khemna: Nopsakna a kipan saltanna hon tuntu:

'Singgah nek theih' ahi chih ahon

theihkhiak in taksa lunggulh hih pichinna leh tu leh tu a kipahna hontunthei thilte a genkha mahmah hi. Sa lunggulhna in tuh, Pathian in a phallouh hang in nang a ding a anop aleh hihsuk mai in, chi in mite hanthawn sek hi.

Adam leh Eve ngei in leng, singgah pen nek theih dia kilawm ahi chih a theih un, Pathian thupiak mang sangin sa lunggulh hihpiching in thiegah a ne uhi. Hiai in kipahna sang in sihna leh khelhnasal a tanna ahontun maimah hi. Khelhna in nopsakna a hon chiam a, himahleh huai sawt a daih hetkei hi. Nop sakna sang in Pathian apan gamlat semsem na a hon tun hi. Zalen ut kisa selua, i sa lunggulhna i kithuzoh sak chiang in zalenna I mansuah daih uhi. Mit lunggulhna a khemna: Pathian' hon piaksa khel a lunggulhna

Theigah tuh mithiptak ahi chiha hon ngaihtuah nawn hi. Hiai duhgawlina in tuh deihbehna ahon tun a, ei a ding a hoihlou thil tampi hon tun ding thilte nasan etlahna in kidim sek hi. Hiai mit duhgawlina in tuh

Pathian'n hon piaksate tung a lungkimlouhna a hon tun hi. Eve ngei inleng theigah mithip tak mai a ahon muh in, huan a singgah neksenglouh a neite hi nawntalou in, neklouh ding a gen a om, singgah tuh a lou in a neta maimah hi. Hiai duhaamna/ duhgawlina in lungkimlouhna, hazatna leh miengna ahon tun maimah hi. Pathian' hon thupiak bang a khovel en nawntalou in ei muhdan tungtawn in i hinkhua i en ua I lungkim theikei uhi. I mit in ma a kaih chiang in, i lungtang in puakgik tampi aneihloh hi.

Kiletsakna na lunggulhna a khemna: Mah ni leh mahni huntaww kisakna *"Theigah in mipilsak ding a theigah etlahhuai"* ahi chih a hon ngaihtuah khia hi. Hiai duhgawlina/ duhaamna tuh Pathian a kipan taimangna khawktak ahi. Pathian a kinganawnlou a mahni a hing utna leh mahni a dingkip zou dia kimuanna ahi a, houchik in genle, *'ken Pathian sang in ka thei zaw'*, chihlam kaww ut mahmah hi. Adam leh Eve in tuh thumanna

tellou a pil a utu a, a hinkhua tung ah thuneih a ut mahmah uhi. Hiai kisaktheihna leh duhgawlina in tuh Pathian toh a kizopna uh kitansak in kikhenna leh lauhna ahon tun maimah hi.

I lungtang a kisaktheih Chiang in, Pathian mun awn khalou in i nawlkhin uhi. Lunggulhna diklou 3 (thumte) gahsuah:

Hiai lunggulhna diklou thumte a kipan a gah kilawmlou takmai a hong gahkhia hi.

1. *Lungtang kingaihniamna sang in zumna a tun*
2. *Lungmuanna sang in lauhna a tun*

3. *Itna sang in kingohtuahna a tun*

4. *Pathian toh kigamlatna atun hi*

5. *Khovel ah sihna a tun hi.*

Khelhna in thil a hoizaw hon tun ding i saklai in, punna sang in manna a hontun zaw hi.

Thukipahhuai: Adam in a zohlouh Jesu'n a hon zou hi. Laisiangthou vuallehna tan ah khawllou in, Adam nihna 'Jesu' ah lametna hing a honpia hi. Jesu Gamdai a khem a aom in, hiai khemna nam thumte mah in khem in om a, himah leh Aman Pathian' thu taisan lou in ana khial kei hi.

Adam leh Jesu khem a aom na I enkhawm zual ding. Khemna tegel in 1 Johan 2:16 a kigen ana zui mahmah hi.

|                               |       |                                                                      |
|-------------------------------|-------|----------------------------------------------------------------------|
| Adam & Eve (Gen 3)            | ————— | Jesu (Matthai 4)                                                     |
| Singgah nektheih ahi          | ————— | Suang tanghou suahsak ding (taksa taisak ding mah lunggulh in om hi) |
| Mit hiptak                    | ————— | Khovel thupinate etsak in om                                         |
| Mi pilsak thei ding a theigah | —     | Temple vum a kipan a tawmkhe ding a khemna                           |

Adam masa huan ah khem in om a, Adam nihna gamdai ah khem in om hi; Adam masa nek leh tak

kiningching mun ah omin Adam nihna gilkiel in om hi; Adam masa thumanglou in ana khial ua, Adam

nihna in thumanna in vualzou in; Adam masa in Mohpaihna leh Hamsiatna tuak ua, Adam nihna tungtawn in Siamtansakna hon tun hi.

Jesu ziaik in i khelhnate ngaihdam in om a, Pathian toh i kal sesa bawlhoih in om a Tangtawn hinna i nei thei hi.

**Saptuam te a ding a thukhah:**

A tung a lunggulhna i gente'n niteng in hon tuamkhum in a hon mantang ut gige uhi. Pathian' thu muan zoh

louhna, ginlelhna leh gintak zohlouhna hon tun sek hi. Pathian muanna leh A thupiak zuihna in Hinna hoih leh dik ah ahon tonpih zaw ding hi.

**Thukhitna**

Mihingte pukna in thumanlouhna in sihna a hontun chih hon sinsak a, Tangthupa in Thumanna in Hinna a hon tun chih ahon sinsak hi. Eite leng 'saptuam Laisiangthou a kinga, khovel lunggulhna te a kingalou, Jesu' vualzohna koppithe hi thei ding in i kichial uhi.

# NA THUMNA

## *bang level ahia?*

- V. Nunlian

Khenkhat gingta taka a thum lai un, khenkhat a ngeina (routine) dan a thum in, a thumna dawn ahihleh hih louh lam leng a ngaihsak khol kei ua, thumna a neih himhim ziaak un hih fuh a kisak thoh mai uhi. Khenkhat in lah amah lamet bang-a a thumna dawn ahihlouh ziakin Pathian a taisan ua, khenkhat lah thum napi in a thumna dawn ahih ding a lamem ngam tuan kei uhi. A bangteng hileh a nuai a bang in thum dan khenkhat houlim khawm le!

### **Ngetna Thumna :**

Ka nek ding uh hon pia in, zingchiang ka program uh hon lohching sak in, ka khualzinna ah hon pi in, ka tate hon kep sak in, hatna hon pia in, damloute damsak in, ka nek din uh hon vualzawl sak in, ka lupna uah hon veng in chia panpih ngetna thumna tuh a tangpi thumna hivek hi. Hiai bang thumna tuh gingtu hinkhua ah level niampen ahi a chi uhi. Gingtu tamtakte'n a damsung teng uh ngetna thumna toh zangbei uhi.

Mi tamtakin Pathian toh kithuah a tonkhawm theih, lawm hoih a neih

theih ahihna lam sang in gamlapi a thupitak a om beubau bang a ngaihsun in, bangkim hihthei ahihna lam kia en in ngetna thumna ngen toh hinkhua zang uhi. Pathian tuh taksap awng hu, panpihtu, i poimohte petu dan kia toh et khak theih ahi.

Pathian i chih i poimoh teng honpia Pathian ahikei a, ei a ding a hoih leh ki hun geih hon pia Pathian hizaw ahi. Khatveivei chidamna sang in damlouh ahoih zawk hun a om a, lohchin sang a lohsapna ahoih zawk hun a om. Huai bang mah in hauhna sang in zawna in

ahon bawloih zawk hun a om hi. Mihingte'n i deih louh teng a sia ahipah kei a, haksatna, thuakgimna omlou in panpih i ngaih hun om lou hileh mihingte'n Pathian i taisan pah ding hi. Kipahna leh nopsak ding ut a i nget lai in Pathian in lungkhamna i tuah ding ei a dia hoih zaw lai tadih hi a atheih bang in haksatna hong tung zel hizaw hi. Ngetna thumna neih ding hinapi in mahni deih dan leh lamet dan neisa a thumna ahih louh ding ahi. Aziak ahileh mihing lamet dan a thumna dawn ahih louh chiang in khenkhat Pathian tung a khasia, thumnate dawng taktak ngei lou Pathian bang a ngaihtuah kha pawl om hi.

Poimoh na hauh luat ziak a Pathian pom maimai na hi hiam? Ahihleh hondampa ahihziak a Pathian nei? Pathian tuh ginna a saan masak ahi a, amah toh kizopna det tak nei mite tuh a kiang a thum uh hizaw ahi. Poimoh na neih ziak himasa lou in!

**Midangte adia thumna :**  
Midangte adia thumna i chih in

bangpen tak kaw k ahia? Damlou na thumsakte, lusuunte adia khamuanna na ngetsakte hoih lua hi. Himahleh, midang kua hiam hauhsakna din na thumsak ngei hiam? Pilna a neih na ding in? A sumdawnna lohchinna di'n? Nang kia a ding ngen-ngen lou in, na gei om na lawmpa'n tuni hun nuamtak a azat na ding in na thum ngei hiam? Na seppihpa tuni fel tak a aom na ding, midangte'n a ngaihnat na ding un na thum hiam?

Mahni kia ki ngaihtuah, angmasial luatna tuh mi pichingloute mizia ahi. Midang awlmoh, midangte hoihna ding a thumpih, midangte adia thum mi tuh Khristian hinkhua a mi pichingte omdan ahi. Khristian hinkhua tuh midang ngaih poimoh na hinkhua ahi a, huai leng midangte hoihlounate gen a ngaihven chih lam ahikei, ahoihna ding uh ngaihven ding, thumpih ding ahi. Hiai tuh itna nasep, Pathian deihdan leh amah nna i sepna ahi. Midangte adia thumsak hinkhua kichi thil haks, lungtang kiman, lungtang siangthou leh

awlmohna neih taktak ngai ahi a,  
gingtu piching mite hih ahi.

#### **Khalam kidouna thumna :**

Hiai, khalam kidouna thumna tuh muhtheihlauh kha gilou leh lungtang ngaihtuahna dikloute thumsakna ahi. Ephesa 6:12 a agen bang in, lalnate, thuneihnate, hiai khovel mial lak a vaihawmtute leh van mun a kha giloute thumna tungtawn a douna ahi. Khalam kidouna thumna nei thei gingtu tuh kha mit a hak ahih a ngai a, kha gilou nasep dan thei siam mi ahih ding kism hi.

Luka 10:19 ah Jesu'n "*Melma thilhihtheihna tengteng zohna kon pia*" achi hi. Hiai kha gilou, lungsim niin pu, ngaihtuahna dikloute zohtheihna gingtute kiang ah piak khit in a om a, huai zang a i dou ding ahi. A vanzat hoih pen tuh thumna ahi. Hiai thumna in kha gilou leh a nasepte a dal thei a, lungsim niin a siangsak thei a, ngaihtuahna dikloute a adik sak thei hi. Khami lou in khalam kidouna a dou thei het kei ding.

Hiai thumna nei thei ding in khami, Pathian a kinga, Bible sim taima hih a ngai hi.

#### **Dai khinkhian leh Pathian ngak kawm a thumna :**

Hiai bang thumna tuh kam a thumal samkhiak lam sang mah in lungtang sung a thum, Pathian deihdan bang ahi dia aw chih ngaihtuah kawm a amah ngak ngit-nget na ahi. Pathian kiang a banghiam khat na nget, amah hon dawn hun ngak nawn tuan lou in nang na ut bangbang na sep khum daih hia? Nang hih dan pen Pathian dawnna hi mai dan in na koih hia?

Pathian' zia ngakzohna kichi mi pichingte omdan ahi. I nget toh kion a dawnna lamem zui pah! Gingtu pichng, khamite'n bel Toupa a ngak khinkhian thei uhi. Amah dei h bang ahi dia aw chi in zong ua, a ngak zou uhi. Alungsim ua pawt teng a gen khe zutzut kei ua, bangpen dik adia aw chi in lungsim a thum kawm in a ngak uhi. Dai khinkhian i chih in a gennop pen tuh Pathian' ang a

lungmuang tak a khawlna ahi. Van deihdan ngak khinkhian ua, ahun  
 a pai chihna ahikei, khalam a tak ah Pathian in a haksatnate uh  
 Pathian toh kithuahna genna ahi. lakkhiak sak in a panpih zel hi.  
 Ahi, khovel buaina, haksatna, Hiai bang hinkhua ahi Pathian in a  
 mangbatna tuamtuum te'n hon zon, akipahpih.  
 bawm mahleh Gingu khami te'n  
 bel haksa sa lou hilou, lungkham Thum in, thumzel inla, gingu piching  
 lou hilou, himahleh Pathian ang a hi ding leh khami thummi hi ding in  
 kitulut in dai khinkhian in amah Pathian in hon vualzawl hen.

# GEN Z

## BANGCHI THUNUNTA DING?

- V. Nunlian

Gen Z i chih Chiang in, tuailai 1997 apan 2012 kikal piang mite genna ahi. Myanmar buaina, Nepal buaina, Bangladesh, Phillipines leh khovel mun tuamtuam a kikhkna deih a kiphinna ah hiai Gen Z te'n khovel tokling zou mahmah uhi. Piching a lut nailou, ngaihtuahna kiptak khat paipih, sih khawk salou a kipumpiak mite ahihman un a nawkna lam ngal uh vang hokhok maimah ahi. A dik lam a nawk khak uleh phatuam petmah, huai bang geih in a diklou lam a nawk khak uleh leng naktak a poi petmah zel ahihmanin pilvan tuak tampi om hi.

90's malam a piangte'n tulai khovel theihna sang mahmahte i phut khak ma un hinkhua a tup leh ngim ahong ki dot Chiang a i dawnna tangpi tuh, - Doctor hiam, Missionary chih hiam ahi deuh vek! Kua a na ngaihsan chih dotna lah "*Ka nu leh ka pa*" chih khawng, lehkhabu ngaihnat pen chih dotna bang tuh "*Bible*" chih hi ngei-ngei mai! I ngaihsan luat ding le ki thei lou ahihchia mawltak a akilawm dan a kidawng suk vek mai ahi.

lunglutna lam kia en ziahziah thei, asia apha muzui ziahziah uh ahihman un bangkim amau lunglut dan a pai thei dia lametna lungsim put toh khovel zap uh ahihman un nu-leh-pa hi in makaite hitaleh amau deihdan pekhe ziahziah dia lamen, neuchik amau ngaih louhdan pom siam lou, a theih tamna un chapouna tun in sang a upa zaw zahtakna piak kitasam, makaite soisel ek-ek khawng pilna leh thupina a ngai ahi uhi.

Khangthak Gen Z -te ahihle digital khovel a khangkhia, amau

Bangziak a tulai khovel a shorts video huchi tel a thangsak i hi hiam

i chih leh, tulai khangthak (Gen Z) te lunglut hun tomchik sung a etkhit pah ding a misiamten ahon bawlkhiak uh ahi. Thu hoih saupipi ten ngaihven loh thou mahleh houchi, tomchik video-te mahmah ngaihven loh in pang hi.

90's malam teng in La i ngaih nop mahmah khat pen kintak a mekkhiak theih ahikei a, radio a hong kikhah hiam, tape record (reel omte) abanban a i ngaih phot hiam, a cassette lakhia a i pei chenchen phot ngai masa hi. I deihte muh na ding in tha tampi, hun tampi lut hi. Hiai in lungduaina, thuakzohna hon pia hi. Tulai khovel bel huai ahikei, i ut-ut, i deiht hunhun a mekkhiak theih ahi.

Tulai khangthak, a deiht teng uh kintak a muh na khovel ah, Upa zekai sim duahduah, thugen sau a sau, biakna fel lou leh kizen mahmah lou a i om chiang in a thuak theihna un zoulou pahpah hi. Huaiziakin tulai khovel toh ki adjust (kibawllem) kawm a, khangthakte bangchi pi, bangchi makaih ding chih tuh thu poimoh

lua leh sin tuak mahmah khat hong suakta hi. Huai ding in a mizia uh theihchet kisam hi.

### **A hat louhna uh :**

Dohtheihna tasam in khase baih mahmah uh. I gensa bang in thil bangkim baihlamna khovel a lut kha uh ahihmanin a deiht dan uh leh a lunglut dan ua thil om pahpah dia ki lamen ahihmanun dohtheihna tasam uhi. Dohtheihna tasam nanana tuh khase baih in, huai tantawh a lungkimna tasam sak hi.

Lungkim louhna a neih tan un hun leh pha lai ding. A khasiat peuhmah uleh a ngaihtuahna uh hat lua ahihmanin mahni kithah ding hangsan mahmah zawmah ua, hiai tuh a buaihuai mahmah, tulai a mahni kithat tamna san leng ahi zui ngal hi.

Lawmpawl lou a phone (internet) kia toh room a khosa den ahihmanun lawm thuah, midang toh relationship hoih neih ding tasam ua, zi leh pasal kineihna ah leng neuchik akal uh anop kei leh kikhen ding ngam pah mai uhi.

Etsakna khat ah, Utube a Donald Trump in US President ahihna toh thuneitak a thil ahih hmiah-hmiah khawng en huai sa, huai dan a, Pa deuh a thil hih hmiahhmiah ding lunggulh uh, lah hithei taktak lou, thil amau thu a apai ziahziah louhna pen lungsim natna a nei uh, huai in tulai a thang mahmah kingaihsiatna, thangpaihna ziaak a insung a helna, kitom, mahni kithah nopna piang. Khenkhat in mahni kithat dek chih khawng lawmte lak a thupina, pa kisakna a ngai zui zawmah pawl om sawn lailai hi.

Nidang in mi kua hiam, lehkhia siam deuh, BA pass, Doctor, sepna nei, Officers, Police-te khawng kizahtak mahmah in, ki lau mahmah hi. Tulai khangthakte'n Doctor ahihziak hiam, Police ahihziak hiam, sepna lian nei khat ahihziak hiam in ngaisang zaw lou ua, amau lunglut bang a sem thei, hihkhe chatchat theite ngaisang petmah uhi.

#### **Nu leh pa-te mohpuak :**

Mohpuakna tampi omte lak ah a tangpi deuhthe gen lehang! Nu-leh-

pa ten i neu lai a, ei sang a naupang zawte i ut dandan a i sawl dan hinkhua pen hi thei nawn hetlou ahi chih theih masak poimoh hi.

A gen uh ka theih gige khat tuh, kei pianna khua ah kou neu lai in, tangval khenkhat in amau sang a naupang zaw-te khua apan meel 2 veel a gamla, gamlak apan khua ah laizial pat na ding mei-am la ding in sawl ua, huai naupang ten lamtawn in a mei-am lak uh a mit louh na ding in muut den uh kichi hi. Huai lai in hithei mahleh tuhun khangthak toh hiai hinkhua pen kituak nawn lou ahi chih phawk kisam hi. Tulai khangthakte amau hun toh kituak a zongsat a neih bang un, nu leh pa te'n leng ei hun lai a i zongsat dan a pai teitei i sawm khak ding ven huai hi. I gen omzia bel, mi'n amau dikna kitheih chiat ahihman un sepaih sawl a kisawl mawk theih hi nawnlou ahi chih i gen nopna ahi.

Khangthakte tuh genhak le genhak uh, huai bang geih in thil le thei lawtel uh, siam le siam uh ahihanin a siamna uh bangchi zat ding? chih

pen i ngaihtuah khiak ding ua thil poimoh ahi nawn hi. Etsakna ding in, na tapa in shorts video lak ah jokes (chiamnuih) en mun ahihleh na inkuan sung ah aman chiamnuih a bawl hun ding bawl sak lechin hihfuh mahmah kha ding na hi. Na tapa in utube a inn lamdan khawng en-en ahihleh midang guai lou in insung a ding dining table bawl pih lechin nuam sa law zen houh mai thei ahi.

Den a i gen, ei neulai a ei sang a naupang zawte i ut dan teng a i sawl theih bang a tulai khangthakte i sawl theih louh pen asia hipah lou ahi. Manbei leh a ziaak omloupi mi thu huchi pawng man i chih haina chikhat ahi chih tulai khangthakten a matchet ziaak uh hizaw ahi. Na sawl leh a ziaak hoihtak a om ding, i simmoh ziaak a sawl i hih louh ding, na sawl na ziaak a poimohna leng a theih ding uh ut uh ahi. A langlam in genlehang, thudik a deih ziaak ua ut dandan a sawl thei lou hizaw na hi hi. A thuman louh ziaak uh hipah lou! Huaiziaak in na sawl nop leh aziak, asan hih lechin fel mahmah kha ding uh ahi.

Deih dandan a i sawl theih louh ziaak nawn khat ahihleh “*Equality*” a ngaih pomoh ziaak uh ahi. A kisimoh tuam ding omlou, mi chih in dikna tanvou ki nei chiat chih a theihchet ziaak uh ahi. Nidang a ana kithei lou, kihai bimbiham inchin ut dandan a ana kihai sawl i hihna uh leng a om him hi.

Himahleh nu-leh-pa te theih dia hoih mahmah tuh, mi chih in dikna ki nei chiat mahleh dinmun zahtak huai tak i nei chiat chih i tate i hih ding uh ahi. Pa tuh hai in mawl mahleh Pa ahihna ziaak a respect ding, huai bang mah in Nu leng tate’n a respect ding uh a mohpuak uh ahi. Hiai dinmun Pathian in ahon piak ahiziaak a taten nu leh pa a zahtak ua, mohpiakna apiakte uh taten a sep ding uh ahihdan theihshiam sak ding ahi nawn hi. Hiai i dinmun zahtak huai tak omsa pen theishiam sak lehang a kilawm Chiang ah i deih dandan un i tate uh i sawl thei leuleu ding uhi.

Nidang lai in Police, Sepaih i chihthe kilau mahmah a, meithal agin nak leh a khozang in kitai souhsouh mai

hi. Himahleh tu khangthakte en lehang sepaih lauhna a om kei a, meithal ginna lam a naih zawmah uhi. Hiai in a etsak khat tuh, thagum leh ki pawng zek a thil hoih ding vual ahi nawn kei chih ahi. Ahihleh bangchi bawlhohi ta ding?

Simmoh leh pawng bawl zathadah petmah ahihleh bel, zep a ngaih ni in itna toh zep ding ahong suakta hi. Na zep ziaak hatang gawisa, hang motmot kawm a na gen leh amau leng zathadah ding uh chihna a suak hi. Himahleh na zep pen aziak kamdam in hilh lechin, siik (Iron) a sat lai a deih dandan a i koihi theih bang in tulai khangthak lungtang taak tak tuh itna kam in thuzoh petmah hi. Mi tamtakte sukkhelh ahihleh a itna thu hehsa leh hang motmot kawm a agenkhiaa ahi. Itna pen hehsa hilou ding, kamdam ahiih ding ahi.

Hiai Gen Z i chihte tuh Purpose Driven Generation leng a chi uhi. Huai omzia tuh thil ahiihte uh asan, aziak kichiantak in a thuzoh ziaak ahi. Khangthakte'n khangluite sang in sum ngainaw lou zaw ua, sum a

khem lungdam leng haksa zaw uhi. Hiai ziaak tak in politician tampi buai loh uhi. Hiai khangthakte tuh sum sang in thil paidan dik zaw leh chih lunggulh ahi uhi. Na thilhih dik leh hon zui hulhul mai ding dan uh ahi. Khangthak control hak, mi zahtakna nei lou chia i mohpaihte tuh thudik ngaihnat ziaak a thumanglou ana hi nuam ek ua, a diklou pen a upa lamte, politician sum negugute ana haw petmah uh ana hi zaw. Midiktat hi a ahon theih nak uleh sih ngam a hon zui ding dan ahi uh. Hiai in a gen nop tak ahihleh khangthakte na thuzoh nop leh nang a dik hihi lechin control zou mai ding dan na hi. Diktatna ana poimoh mahmah dan ahi.

Nidang in kholak a i teacherte i muh chiangin i ki tuah ma in i ki hemmang sek ua, tulai khangthak lak ah huai dan om zekzek mahleh kibukmang sang mah in "*Hei Miss, dam maw.. koi ah?*" chi suk pah uhi. Polite uh, kam tei uh, khovel maituah ngam uh ahi. Hiai zia pen beven ziaak hipah lou hi. Hichibang khangthak lak a mit khup dundun, houpilh theih mang louh a i om ding

hilou in, mawl in siam kei lehang  
leng houlim pih theih, a mit ua en a  
thil genkhawmpih theih mi khat i hih  
ding uh thil poimoh ahi nawn hi.

Nidang a ann ne dia i kisawl chiang  
in bangtan hiam akilawm dan in i  
ut kei masa phot sek ua, ann thuk  
bangte bang in leng mi'n ahunta a  
chih nung un, a kisanlah man chi  
in thuk beh ek sek uhi. Tulai  
khangthakte kiang ah akilawm dan  
a “*duhlou*” na chih masak zenpeuh  
leh “*Awle*” chi hiau mai ding uhi.  
Ann ne ut napi in, akilawm dan a  
“*Ka vah e, ka ne dah d*” na chih  
zenpeuh leh hong kisawl nawn lou  
ding hi. A omzia bel tulai  
khangthakte'n akilawm dan hilou  
in, thil ahi hi a khosak nuamsa uh  
chihna ahi hi. Huaiziakin, na  
iplahna bangle a heem a na gengen  
leh mansiam lou ding uh ahihmanin  
i awi louhna a om leh aziak asan  
diktak genkhiak pah geih, huai  
kawm a kibawl thak dia deih na  
hihdan genkhe geih ding, hilh geih  
ding. Khatvei i hilh nung a, huai  
mah gen a hilh kik-kik lou ding, i  
genkhiak pen tak ding, hun sawt la  
lou ding, gen kik-kik lou a zoh hiau  
ding ahi.

Nu leh pa tamtak social media  
khoih theih louh ziaak a tate  
aphunsan lam a paikha ki om hi.  
Huai pen poi mahmah hi. A khoih  
thei sunsun lah kilawp lua in thil va  
gengen kha, tate adia zumna tun  
chih leh om theih nawn leuleu hi.  
Huaiziakin khangthakte i kepna ah  
nu leh pa leh khotang makaite  
pilvan na ding tam mahmah hi.

Thuhilh leh tai a ngaih hun un,  
alawmte hiam, a naute hiam,  
midang zak a tai/thuhilh pen  
kiselphouna a ngai in zadah  
mahmah uhi. Hih leng hihim hi.  
Tai hun, thu hilh hun ah leng ahun  
dik tel siam, ngakzoh ngai mahmah  
nawn hi.

Gen tuak tampi om mah lai  
mahleh tutung a ding in hiai tan in  
i zou phot ding. Tutung a i thu  
gelh in Khangthakte etkolna ding  
lam deuh ahihziakin nu leh pa lam  
nawk deuh hi. Amapha a zang  
chiat thei dingin Toupa'n hon  
vualzawl hen aw.



## PILANGKATTA PC APAN REPORT

Toupa Hoihi, a tawntung in!

Pillangkatta Presbyterian Church in ni 3 daih Hotdamna Chialpi, "*Na pianthak ngei ngei ding ahi*" Johan 3:7 chih thupi a nei in, Heutunu Rith Tombing zang in khasiangthou nasepna thupitak i tan man un, Toupa thupina tengteng i pia uhi.

Banah, Sunday school building honna Heutupa Rev. & Dr. Khen P Tombing, Chief Coordinator in hon neihsak a, i kipak petmah uhi. Hiai hun ah salam leh khalam a hon hanthawn Rev G Suanzalam, Coordinator (M) leh Nu Biakkim tung ah leng lundamna lian petmah hi. Sep ding bawl ding om tengteng saptuam member a neu alian pangkhawm siau siau a i om na tung uah, i kipak petmah hi. Khasiang thou vehna tamsem i tan chiat uh laman kawm in, i saptuam in tukum thupi a ineih, "*Krist a kilamthakna*" a gah suang tu hithei sem ding in panla chiat ni. Toupa'n mi chih hon makaih chiat ta hen.

- Deacon V. Pungouthang, Secretary, Pilangkatta, PC



Lungthul (T) PC Silver jubilee lopna ding toh kisai Local Session in Jubilee Committee Dt 9/012025 in bawlkhia a, Committee makaihna mah in sep leh bawl poimohte sepzui ahi. Amasa pen in Lamlian (Guite road) LungthulT leibul lamlian kuakte kibawl ban ah lei (Bridge) tung a leisai (Hawktui in a sehnnon) 6 inch. khawng a sah hahsiang in gari hong taite apan a kiphal dandan uh sum kila hi. Lamka a i saptuamte kiang ah Bawngsa zuak ahihban ah Gua ni thum kisat nawn hi. Jubilee a ding in saptuam in tha 440 sang a tawm zaw lou kiseng hi. Kum 25 tan honpi, hon makaih, Jubilee lawm thei dia honpi Jehova Pathian min phat in A tung ah kipahthu ka uhi.

1. Jubilee suang honna leh latna ban ah Thugenna manphatak hon neih sak Rev. Dr Khen Tombing (Chief coordinator)
2. Short Message hon neih sak Rev. G Suanzalam, Coordinator (Min), Rev. M Thangkhanmuan, Coordinator (Mis. & Instn.) leh Rev. Dr. G Pau Muanthang, Principal, ReST-te tung ah kipahna lian mahmah hi.

Huaite ban ah Pastor Station a ana neisate leh saptuam phuhkhiak/ dinkhiakna dia pan ana la-te leh Lamka a i saptuam leh mimal bawngsa hon na leisakte tengteng ban ah kho kim, kho kiang a saptuam hon uap a Jubilee kipahpihna thilpiak hon pete tung ah kipahthu kon gen uhi. Head Office leh ReST apan in leng kipahpihna thilpiak ki dong a kipahna lian mahmah hi. Toupa'n noute aleh tampi in hon vualzawl hen aw.

Sd/-DEAC. LIANMUNG MUNLUAH  
(Secretary SJCC)

Sd/- ELDER G. VUNGSUAN  
(Chairman SJCC)

## ReST SILVER JUBILEE CELEBRATION (2001 - 2026)

### *Programme*

**Amun:** ReST Campus, Mata


**Ani:** February 1, 2026 (Pathianni)

**Ahun:** 01:00 PM

|                              |                                                   |
|------------------------------|---------------------------------------------------|
| <b>Conductor :</b>           | Elder KP Vanlalsanga, <i>Board Member</i>         |
| <b>Patna Thumna :</b>        | Rev. M. Thangkhanmuan, <i>Board Member</i>        |
| <b>Phatkhawmna :</b>         | Lapite Makaih in                                  |
| <b>Vaidawmna :</b>           | Rev. M. Khamlianmang, <i>Board Member</i>         |
| <b>Jubilee Suang Honna :</b> | Ms Hoihkim Tombing w/o Rev. Vung D. Tombing       |
| <b>Jubilee-Dak Khetna:</b>   | Teltuam mi 25te                                   |
| <b>Jubilee Suang Latna :</b> | Rev. G. Suanzalam, <i>Board Member</i>            |
| <b>Phatna Lapawl :</b>       | Hallelujah Chorus, <i>Rayburn P.Y.F</i>           |
| <b>Souvenir Honna</b>        |                                                   |
| <b>leh Thugenna :</b>        | Rev. Dr. Khen P. Tombing, <i>Board Chairman</i>   |
| <b>Principal Report :</b>    | Rev. Dr. G. Pau Muanthang, <i>Principal, ReST</i> |
| <b>Phatkhawmna :</b>         | Lapite Makaih in                                  |
| <b>Ankuang Latna :</b>       | Pastor G. Paukhansiam, <i>Bialtu Pastor</i>       |

**Tanhawmna:**

1. Usher leh Refreshment: Mr. G. Liankhanmung leh student-te
2. Sound System: Mangpi Tombing
3. Nektak vai: Mata Deacon-te
4. Physical Arrangement: Sir Lalpu leh student-te
5. Lapitu: DK Siam leh a lawmte



- Feb. 01 : Kha thak hon musak Pathian tung ah kipahtu gen in, tu kha thupi “*Thumna leh geelna tungtawn a kilamthakna*” gahsuah tak a i zat a, Kha leh sa a vualzawlina hon tuntu ahihna ding in Toupa kiang ah thum ni.
- Feb. 02 : Tuni in PCI nuai a Village School i neihte lut nawn ta ding uhi. Sinsaktu leh naupangte siamna, pilna leh chidamna nei a, siamsianna gahsuah a suahna ding in thumni.
- Feb. 03 : Tukum Sunday School Piching leh Naupang lam gahsuah tak a i zat ua, Kha leh Sa a vualzawlina leh kilamthakna hoihtak ahong hihna ding in thumni.
- Feb. 04 : Pastor transfer & posting kigel bangbang bangmah buaina omlou a zaoh hita. I postorte a omna chiat ua saptuamte adia vualzawlina ahih chiat na ding un thumni.
- Feb. 05 : Tu ni in i saptuam nuai a Missionary i chawmte, agency tuamtuum toh partnership a i sephawmnate, khovel pumpi a missionaryte a ding bik in thumna neihsakni.
- Feb. 06 : Local chih a kumthak vaipua, Session Committee, Board of Deacon leh department tuamtuum a vaipawte a ding bikin chihtakna, lemgelsiamna, inkuan chidamna ngetsakni.
- Feb. 07 : Tuni in khotang leh MLA-te, State leh Phualpi solkar a vaihawtute thumsak in, chidamna leh Toupa deih bang a vaihawmna apai zel na ding in thumni.
- Feb. 08 : Tuni Zomi National Day of Prayer ni ahi. Zomi sung a vaihawmtute, pawl tuamtuumte leh Zomite maban ding, gam leh nam vai ah Toupa sam in ki ittuhna ngen ni.
- Feb. 09 : Tuni in khamtheih ziaak a buaina i kim i kiang a mi i theihte ahong ki khek na ding un chihtaktak in thumsak in, a inkuan mite leng thumsak ni.

- Feb. 10 : Tuni in Insternship Pastor i neihte gel,- Kapsuanmung leh H Lamkhanlian a ding bik in thum ni. Aomna saptuamte adia khanna hi ding leh inkuan chidam nget pihni.
- Feb. 11 : Tuni in Thanlon Presbytery sung a Pastor om khate leh a inkuanthe uh thumpihni. Rev. M Khamlianmang, Pst. K Thangmuanlal, Pst. Ngamtinghang leh Pst. Kamdounang.
- Feb. 12 : Tuni in Singngat Presbytery sung a Pastor om khate leh a inkuanthe uh thumpihni. Rev. K Dongkhankhup, Pst. KC Thang Gualnam, Pst. TK Shyam leh Pst. Nanglian Tonsing.
- Feb. 13 : Tuni in South Lamka Presbytery sung a Pastor om khate leh a inkuanthe uh thumpihni. Rev. K Zamkhansuan, Pst. G Paukhansiam leh Pst. K Muankim.
- Feb. 14 : Tuni in Lamka Presbytery sung a Pastor om khate leh a inkuanthe uh thumpihni. Rev. H Thiankhanmuan, Pst. G Vungsangmung, Pst. T Liankholal leh Pst. V Suankham.
- Feb. 15 : Tuni in Thanlon Presbytery sung a saptuam omte amalmal a lou in thumsakni. Mualnuam PC, Songtal PC, Kaihlam PC, Tallian PC, Thanlon PC, Bukpi PC, Sinzawl PC, Covenant PC leh Mimbung PC
- Feb. 16 : Tuni in Singngat Presbytery sung a saptuam omte amalmal a lou in thumsakni. Simbuk PC, Singngat PC, Bethany PC, Jaolen PC, Maukot PC, C Tuiveljang PC, Suangdoh PC, Enpum PC, Lungthul (T) PC, Lungthul (L) PC leh New Kangkap PC.
- Feb. 17 : Tuni in South Lamka Presbytery sung a saptuam omte amalmal a lou in thumsakni. Mualkoi PC, Gangpimual PC, Thingkangphai PC, Mata PC, Mualtam PC, Canaan PC, T Daijang PC leh M Saljang PC.
- Feb. 18 : Tuni in Lamka Presbytery sung a saptuam omte amalmal a lou in thumsakni. Rayburn PC, Olive PC, Bungmual PC, Vaalveng PC, Engedi PC, Zion PC, Bethel PC, Zenhang Lamka PC, Bethsaida PC, Goshen PC leh Rehoboth PC.

- Feb. 19 : Tuni in PMF Headquarters, Presbytery Level a PMF vaipawte leh Local a vaipawte a ding in thumni.
- Feb. 20 : Tuni in Presbytery Level a PWF vaipawte leh Local a vaipawte a ding in thumni.
- Feb. 21 : Tuni in Presbytery Level a PYF vaipawte leh Local a vaipawte a ding in thumni.
- Feb. 22 : Tuni in Presbytery Level a PCF vaipawte leh Local a vaipawte a ding in thumni.
- Feb. 23 : Tuni in Music Upliftment leh Central Choir a vaipawte ban ah membrete'n la a phatna vualzawlina tampi toh ahon sepkhiaik theih na ding un thumpihni.
- Feb. 24 : Tukum GA leh PWF Joint Conference neih kop ding hita ahihmanin hiai ding a vaipaw kha leh committee dingte'n lohching tak a ahon sep theih na ding un thumpih ni.
- Feb. 25 : Tuni i saptuam sung a nasepna poimoh tak Board of Deaconate nasepna thupi sem leh gahsuh sem a ahong om theih na ding in thumsakni.
- Feb. 26 : Tuni in siamsin tuailai sepna zongte a ding bik in thum ni. Pilna, theihna leh kuhkalna toh pang a singtang mite tamsem i lohchin theih na ding un thumni.
- Feb. 27 : Tuni in Lou nasepna toh kisai in thum ni. Buh leh haichite bitna ding, hoihtak a khanna ding leh vuahtui ahun bang zel a i donna ding un thumni.
- Feb. 28 : Tuni in Government Office leh Damdawiin a Khristian semkhate teng, kuhkalna, nunnemna, midangte ngaihsakna hoih sem a neih na ding un thumpih ni.
- Feb. 29 : Tuni in i saptuam mi sepaih leh sepna ziaak a mun dang a omte Pathian ompihna atan na ding un thumpihni.
- Feb. 30 : Feb. 1 chiangin ReST Silver Jubilee lopna leh Pathian kiang a kipahtu genna om ding. Lohchingtak a program zat ahihna dingin thumpih ni.
- Feb. 31 : Khatawp hon musak Pathian kiang ah kipahtu gen in khathak a amah pina tamsem tang dingin ngetna bawlai.

# REFORMED SAMARITAN V2.0

LAUNCHING AND  
AWARENESS  
PROGRAM



**FEB 10, 2026**

**RAYBURN AUDITORIUM**

**DR. DIKBOI TOMBING**  
(Asst. Prof.)

Conductor

Goulian Samte  
(Vice Chairman LPYF)

Hunpantu

Nemthianniang  
(Treasurer LPYF)

Phatkhawmna

BL 307

Vaidawn thugen

Suankhanmung  
(Chairman LPYF)

Project Launching

Rev. Dr. Khen P. Tombing  
(Chief Co-ordinator, PCI-R)

Awareness

Dr. Dikboi Tombing  
(Asst. Prof.)

Short Speech  
(5-10min)

Rev. M. Thangkhanmuan  
(Co-ordinator, Mission & Inst.)

Thumsakna

Rev. G. Suanzalam  
(Co-ordinator, Ministries)

Kipahthugen

Lian Johnmark  
(Secretary)

Tawpna

Rev. H. Thiankhanmuan  
(Superintendent, LP)

Reformed Samaritane nasep hoihtak, sisan poimohte a thawn a sisan  
piakna nasep a septe uh thupi mahmah hi. Hiai bang nasep sutzop  
tough theih zel na ding un i thumna uah thei zuini.

If undelivered, please return to:

The Editor

PCI Messenger

P.O. Box-32, Presbyterian Church in India (Reformed)

Head office : New Lamka (H) 795006

Manipur, INDIA

BOOK POST

To:



REFORMED SCHOOL OF THEOLOGY (ReST)

**SILVER JUBILEE**

**2001 - 2026**

*Teach us to number our days...*  
*Psalms. 90:10*

Inaugurated By: Ms Hoihkim Tombing  
w/o Rev. Vang D. Tombing, Founding Principal.

Erected by:  
Staff and students  
On: February 1, 2026

Staffs

Rev. Dr. G. Pau Muanthang  
Lalpu Hangsing  
H. Khamminthang  
Chiin Hoihkim  
G. Liankhanmung  
Thangkhanisiam  
D.K. Siam Hangsing

Students

| <u>Master Of Divinity</u> | <u>Bachelor of Theology</u> |
|---------------------------|-----------------------------|
| P. Khamlianmang           | H. Thangsuanhau Simte       |
| Soisianmang Tungnung      | Niangmuan                   |
| Pauthanglian Vualnam      | Niangsuankim                |
| M. Siamlianding           | Muansiamlian                |
| Khupsuanlian Khaute       | Thang Marseille             |
| Ginchinkhup               | Jammuanthang                |
| Mangvinlun                | Goukhentuang                |
| Stephen Ginneihthang      | Sonkhankhual Tombing        |

Diploma

Liansianzung  
Cingkephuai  
Lianmalsawm